

ՀԱՄԱՁԱՅՆԱԳԻՐ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿՐԹՈՒԹՅԱՆ ԵՎ ԳԻՏՈՒԹՅԱՆ ՆԱԽԱՐԱՐՈՒԹՅԱՆ ԳԻՏՈՒԹՅԱՆ ՊԵՏԱԿԱՆ ԿՈՄԻՏԵԻ ԵՎ «ՆՈՐԱՎԱՆՔ» ԳԻՏԱԿՐԹԱԿԱՆ ՀԻՄՆԱԴՐԱՄԻ ՄԻՋԵՎ ՀԱՄԱԳՈՐԾԱԿՑՈՒԹՅԱՆ ՄԱՍԻՆ

Հայաստանի Հանրապետության կրթության և գիտության նախարարության գիտության պետական կոմիտեն և «Նորավանք» գիտակրթական հիմնադրամը (այսուհետ՝ Կողմեր), ղեկավարվելով Հայաստանի Հանրապետության քաղաքացիական օրենսգրքով և նպատակ ունենալով.

- 1) աջակցել հումանիտար գիտությունների բնագավառում իրագործվող հիմնարար, կիրառական բնույթի գիտահետազոտական աշխատանքներին, որոնք գիտության զարգացման գերակա ուղղությունների շրջանակներում իրականացվում են գիտական կազմակերպությունների, բարձրագույն ուսումնական հաստատությունների, գիտական խմբերի և առանձին գիտական աշխատողների կողմից,
- 2) ֆինանսական աջակցություն ցուցաբերել անկախ փորձաքննության արդյունքների հիման վրա մրցութային հիմունքներով ընտրված հիմնարար, կիրառական գիտական հետազոտությունների նախագծերի իրագործմանը,
- 3) աջակցել երիտասարդ գիտնականների կողմից իրականացվող հիմնարար, կիրառական գիտահետազոտական աշխատանքներին,
- 4) իրականացնել այլ կազմակերպությունների, այդ թվում՝ նաև օտարերկրյա գիտնականների կամ գիտական կազմակերպությունների հետ իրականացվող գիտահետազոտական ծրագրերի համաֆինանսավորում,
- 5) աջակցել գիտական հետազոտությունների արդյունքներն արտացոլող մենագրությունների կամ գիտական տեղեկատվության այլ աղբյուրների հրատարակմանը,
- 6) աջակցել գիտաժողովների, սեմինարների և այլ գիտական միջոցառումների անցկացմանը, ինչպես նաև օտարերկրյա գիտական միջոցառումներին Հայաստանի Հանրապետության քաղաքացի հանդիսացող գիտական աշխատողների մասնակցությանը,
- 7) աջակցել Հայաստանի Հանրապետության գիտական համակարգի կողմից մշակված նոր տեխնոլոգիաների ներդրման ու առևտրայնացման գործընթացներին՝

ՀԱՄԱՁԱՅՆԵՑԻՆ ՀԵՏԵՎՅԱԼԻ ՄԱՍԻՆ.

Հոդված 1

Կողմերը պայմանավորվում են սույն Համաձայնագրին, Հայաստանի Հանրապետության օրենսդրությանը համապատասխան և իրենց իրավասությունների շրջանակներում համագործակցել՝ գիտական հետազոտություններին աջակցելու նպատակով:

Հոդված 2

Կողմերը միմյանց օժանդակում են գիտական նյութերի և գրականության փոխանակման հարցում, ներառյալ՝ յուրաքանչյուր Կողմի աջակցությամբ հրատարակվածները:

Հոդված 3

Կողմերը միմյանց օժանդակում են գիտական նախագծերի փորձաքննության իրականացման և, որպես փորձագետ, առաջատար գիտնականների ներգրավման հարցում:

Հոդված 4

Կողմերը լուծում են համատեղ նախագծերի իրականացման ընթացքում ստեղծված մտավոր սեփականության հնարավոր պաշտպանության հարցերը, ղեկավարվելով Հայաստանի Հանրապետության օրենսդրությամբ:

Հոդված 5

Կողմերը հրապարակում են սույն Համաձայնագրի կատարման մասին տեղեկատվությունը իրենց պարբերական հրատարակություններում:

Հոդված 6

Սույն Համաձայնագրի իրագործման հետ կապված հարցերը Կողմերի միջև լուծվում են նամակագրության միջոցով կամ Կողմերի ներկայացուցիչների հանդիպումների ընթացքում:

Հոդված 7

Կողմերի փոխադարձ համաձայնությամբ սույն Համաձայնագրում կարող են կատարվել փոփոխություններ և լրացումներ, որոնք կձևակերպվեն առանձին արձանագրությամբ:

Արձանագրությունը կհանդիսանա սույն Համաձայնագրի անբաժանելի մասը և ուժի մեջ կմտնի սահմանված կարգով:

Հոդված 8

Սույն Համաձայնագիրը ուժի մեջ է ստորագրման պահից:

Սույն Համաձայնագիրը կնքվում է երեք տարի ժամկետով և ինքնաբերաբար կերկարաձգվի յուրաքանչյուր հաջորդ երեք տարվա համար, եթե Կողմերից որևէ մեկը սույն Համաձայնագրի գործողության ժամկետի ավարտից վեց ամիս առաջ մյուս Կողմին գրավոր չձանուցի այն դադարեցնելու իր մտադրության մասին:

Կազմված է հայերենով, Երևանում, 2009 թվականի *հոկտեմբերի 21*-ին, երկու հավասարազոր բնօրինակով:

Կողմերի իրավաբանական հասցեները

Օրբելի եղբ. փ. 22,
Երևան 0028

Գ.Նժդեհի 23/1
Երևան 0026

Հայաստանի Հանրապետության
կրթության եւ գիտության
նախարարության գիտության պետական
կոմիտեի կողմից

«Նորավանք» գիտակրթական
հիմնադրամի կողմից

նախագահ՝


Ս. Հարությունյան

Կ. Տ.

նախագահ՝


Գ. Հարությունյան

Կ. Տ.